

Չ Գ Ե Ս Տ

Կ Ա Ն Ա Ց Ի Չ Գ Ե Ս Տ¹

Ձանգեզուրի կնոջ զգեստը շատ ուրույն է: Նա նույնպես, ինչպես և տղամարդկանց զգեստը, իր էական մասերով շատ մոտ է Շամախու, Նուխու, Գանձակի, Ղարաբաղի, Ղարադաղի, Մեղրու և Ագուլխի, այսինքն՝ հայկական բնակչության, հյուսիս-արևելյան և արևելյան գավառների կանացի զգեստին: Այստեղ գավառական տարբերություններն ընդհանրապես շատ նշանավոր չեն: Տարբերությունը չափազանց աչքի է զարնում, երբ համեմատում ենք այդ տարազը Հայկական լեռնաշխարհի արևմտյան հայաբնակ գավառների տարազի հետ: Ինչպես նկատվում է արական զգեստի մեջ, այստեղ էլ բացակայում է արևմտյան ասեղնագործ նախշազարդությունը, գլխի հարդարանքի ծաղկավորությունը՝ նախշած գոգնոցը, քիթն ու բերանը մեծ մասամբ բաց և ազատ պահելը: Իսկ զանգեզուրյան խմբի հագուստի մեջ գերիշխում են միապաղաղ գույները, գլխի հարդարանքի ծաղկավոր ասեղնագործությունից խույս տալը, քիթն ու բերանը հատուկ թաշկինակով ծածկելը: Մինչև այսօր էլ զանգեզուրցի կանայք, մանավանդ հասակավորները, որտեղ էլ որ ապրելիս լինեն՝ մեծ դժվարությամբ են հրաժարվում իրենց ծննդավայրի տարազից և կլօխը շինելով ըն այնպես, ինչպես իրենց հայրենակիցները:

Աղջկա և ամուսնացած կնոջ հագուստները տարբերվում են միայն նրանով, որ աղջկա գլուխը շինված՝ կապված չի լինում, այսինքն՝ չի ունենում բարդ հարդարանք, այլ ծածկված է պարզ թաշկինակով, յայլուխավ, որի տակից մագերը իրենց ճոխությամբ երևում են: Հասակավոր կանայք հագնում են ավելի մուգ, իսկ երիտասարդներն ավելի բաց գույնի զգեստներ: Աշխատանքի ժամանակ հագած սովորական՝ լիավուր շորը պարզ կարված, բավական կեղտոտած և հազար ու մի տեղից կարկատած է լինում, իսկ տոնականը՝ աօնավուր², մաքուր և ավելի լավ կարված: Աշխատանքի ժամանակ կապում են շթից կարած գոգնոց, որը պատում է նաև կուրծքը: Գոգնոցը չի կազմում տարազի անհրաժեշտ մաս:

¹ Այս գլուխը մի քաղվածք է այն ընդարձակ նկարագրության, որ Պետ. Պատմ. թանգարանի նախկին գիտաշխատակից ընկ. Նազիկ Ավետիսյանը պատրաստել է որպես մի հատված «Հայկական ժողովրդական զգեստը» վերնագիր կրող հավաքական հետազոտության համար:

² Շատ տեղերում տոնական շորեր կոչվում են կիրակնավուր և դրսնավուր շորեր: Որոշ տեղերում կոչվում են օրգավուրի (գրբ՝. գար), (ծան. խմբ.):